



18. december 2023

Inatsisartut ingerlatsinermut maleruagassaasa § 37 imm. 1 tunngavigalugu Naalakkersuisunut ukuningga apeqquteqaateqarpunga:

Naalakkersuisunut apeqquteqaatit:

- 1. Atuarfinni oqarasuaatit angallattakkat atorneqaqqusaannginnissaannut Naalakkersuisut qanoq isummerpat?**
- 2. Nunatsinni atuarfeqarfiit oqarasuaatit angallattakkanik atuiffiujunnaarnissaasa pitsaaqutissai ajoqutissaanillu Naalakkersuisut misissuinissaminnik aallartitsinissamik pilersaaruteqarnerlutik?**
- 3. Svenskit naalakkersuisuisa meeqqat atuarfiisa oqarasuaatit angallattakkanik atuiffiujunnaarnissaanik aaliangiisimanerisa tunngavilersuutaat pillugit ilisimasaqalernissaq anguniarlugu Naalakkersuisut Svenskit naalakkersuisui attaviginissaanik pilersaaruteqarnerlutik?**
- 4. Eqqartukkamut tunngasunik allanik soqutiginaatilinnik Naalakkersuisut paasissutissiisnaappat?**

(Inatsisartunut ilaasortaq Bjørk Lange Olsen, Demokraatit)

Tunngavilersuut

Qularutissaanngitsumik oqarasuaatit angallattakkat, tabletit teknologiillu allat inuunitsinni ilaaginnalertussatut takkunnikuupput. Soorunalimi teknologi tamanna pitsaaqutitik ulikkaarpoq, amerlagunarpugullu ulluinnarni oqarasuaatit angallattakkat peqanngitsut takorloorsinnaanngikkaat, kisiannili aamma ilumut ingasappallaamik atuineq ingerlanneqalernersoq immitsinnut aperisariaqalerpugut. Oqarasuaatit angallattakkat piffissani ilaanni ikiuutaanatit illuanili aporfuiinnaleqqappat?

Uanilu meeqqat atuarfiat qiviassallugu pissusissamisoorpoq. Ulloq atuarfiusoq tamakkerlugu oqarasuaatit angallattakkat paasussinnaajuarneri ilumut pisariaqavinnerluni, imaluunniit atuartunut ilinniartitsisunullu pitsaaquteqassanerluni meeqqat atuarfiini oqarasuaatit angallattakkat atoqqusaajunnaassappata, atuartullu akunnermi atuarfiusumi malinnaanerulersinnaallutik anitsiarfinnilu peqateqarsinnaanerulersillugit?

Akunnerni atuarfiusuni oqarasuaatit angallattakkat meeqqaniit atorneqarpallaarpata qularutissaanngilaq aporfusassasut, atuartullu anitsiarfinni meeraqatiminnut peqateqarsinnaanerit annikillissalluni. Tusartakkallu aamma ilaatigut nuanniitsuusarput, qingasaarutitut atorneqartalersimaneri, meeraqatimi piffissami nuanniilliornerani immiullugit kinguneratigullu ingerlaartinnissaanut imaluunniit nittartakkatigut inuit naapittarfiini siammarternissaanut qunusaarutitut atorneqartarlutik.

Sverigimi naalakkersuisut aaliangersimapput meeqqat atuarfiini oqarasuaatit angallattakkat atorneqarunnaarnissaat. Atuartut akunnerni atuarfiusuni malinnaanerulernissaat ilikkarnissarlu



DEMOKRAATIT
DEMOKRATERNE

annertusarnissaa, taamatuttaarlu isiginnaarut ukkinnagu atuartut oqaloqatigiinnissaat sammisanilu akuunerulernissaat qulakkiissallugu siunertani annersaapput.

Ataatsimut isigalugu isiginnaarutaasinnaasut tamarmik ullumikkut meeqqat inuusuttullu inuuneranni annertuallaamik akuusoraakka. Ajornartorsiutaasinnaasoq inuiaqatigiittut angajoqqaatullu eqqummaariffigisariaqaripput isumaqarpunga. Inuiaqatigiittut sumiginnaanertut isigissavara meeqqat inuusuttullu isiginnaarutitut taama annertutigisumik atuinerat apeqqusersornagu ingerlatiinnassagutsigu.

Taamaattumik svenskit meeqqat atuarfiini oqarasuaatit angallattakkat atorunnaarsitsinerat soqutiginantutut isigaara, isumaqarpungalu Kalaallit Nunaanni eqqunneqarsinnaanera eqqarsaatersuutigissagipput.

Sammisamut Naalackersuisut isumaat paasissallugu soqutiginantippara, taamaattumillu apeqqutit ullut qulit suliffiusut iluanni akineqareersimanissaat kissaatigalugu.